

- राष्ट्रपति द्रौपदी मुर्मू अंतर्राष्ट्रीय महिला दिवस रे मौके नई दिल्ली मांय राख्या जावण वाळा राष्ट्रीय सम्मेलन रो उद्घाटन करेला-प्रदेश मांय महिला दिवस रा सिलसिला मांय न्यारा-न्यारा कार्यक्रम।
- राज्यपाल हरिभाऊ बागडे सरकारी योजनावां रो फायदो जरूरतमंद लोगां ताई पूगावण सारू अहलकारां ऊं पूरा मन ऊं काम करण बाबत कह्यो।
- जन स्वास्थ्य अभियांत्रिकी मंत्री कन्हैया लाल कह्यो-हर गांव अर ढाणी ताई पीवण रो पाणी पूगावण रो सरकार रो खास ध्यान।
- प्रदेश मांय होळी रो उमाव निजर आवण लाग्यो -रेलवे त्यौहार ने ध्यान राखता थकां खास गाडियां चलावेला।

000

महिला अर बाल विकास मंत्रालय री ओर ऊं आठ मार्च ने अंतर्राष्ट्रीय महिला दिवस रे मौके नई दिल्ली मांय राष्ट्रीय सम्मेलन राख्यो जावेला। **"नारी शक्ति से विकसित भारत"** मुद्दा माथे व्हेवण वाळा ई सम्मेलन रो उद्घाटन राष्ट्रपति द्रौपदी मुर्मू करेला। ई कार्यक्रम मांय सशस्त्र बलां अर अर्धसैनिक बलां रा अहलकार, आंगनबाड़ी कार्यकर्ता अर खुद सेवक समूहां री सदस्य महिलावां समेत न्यारा-न्यारा हलकां री महिलावां, विश्व बैंक, यूनिसेफ, संयुक्त राष्ट्र विकास कार्यक्रम अर संयुक्त राष्ट्र जनसंख्या कोष रा नुमाइंदा सिरकत करेला। ई सागे ई **"शी बिल्ड्स भारत"** हैशटैग सागे एक सोशल मीडिया अभियान ई चलायी ज्यो है। महिला दिवस रा सिलसिला मांय महिला अर बाल विकास मंत्री अन्नपूर्णा देवी कह्यो के ओ दिन महिलावां रा चौतरफा विकास रा बारा मांय चर्चा करण अर अडचनां खत्म करण रो मौको देवे है।

प्रदेश मांय ई अंतर्राष्ट्रीय महिला दिवस रा सिलसिला मांय भांत-भांत रा कार्यक्रम राख्या जा रहया है। जैसलमेर मांय आज राख्यी ज्यो कार्यक्रम मांय महिलावां रो मान करी ज्यो। झुंझुनूं जिला रा पिलानी री सी.एस.आई.आर. सीरी मांय वॉकेथॉन, टेबिल टेनिस अर क्रिकेट समेत न्यारा-न्यारा खेलां री होडां राख्यी ज्यो। पाली जिला रा सोजत मांय राख्यी ज्यो कार्यशाला मांय महिलावां ने वां रा भला री न्यारी-न्यारी योजनावां री जाणकारी दीरीजी। जोधपुर मांय न्यारा-न्यारा हलकां मांय बेहतरीन काम करण वाळी महिलावां रो काल महिला दिवस री पैली वाळी सांझ मान कर्यो जावेला। राजस्थान रोडवेज ई आठ मार्च ने महिलावां अर टाबरियां सारू मुफ्त सफ़र रो सुबीतो मुहैया करावेला। रोडवेज रा प्रबन्ध निदेशक पुरुषोत्तम शर्मा बतायो के 8 मार्च ने महिलावां रोडवेज री साधारण अर एक्सप्रेस बसां मांय प्रदेश री सीमा मांय मुफ्त यात्रा कर सकेला। विश्व महिला दिवस रे मौके महिलावां स्मारकां अर संग्रहालयां मांय ई मुफ्त घूम सकेला।

000

राज्यपाल हरिभाऊ बागडे जनता रा भला सारू केंद्र अर राज्य सरकार री ओर ऊं चलायी जा रही न्यारी-न्यारी योजनावां रो फायदो जरूरतमंद लोगां ताई पूगावण सारू अहलकारां ने लगातार कोशिश करण बाबत कह्यो है। वे आज जोधपुर मांय जिला स्तर रा अहलकारा सागे मीटिंग रे दौरान बोल रहया हा। राज्यपाल क्षेत्रीय विकास अर सामुदायिक उत्थान री योजनावां ने असरदार तरीका ऊं लागू करण रा हुकम दीना। वां रो काल जैसलमेर जिला मांय सीमा सुरक्षा बल-बी.एस.एफ़ री चौकियां रो दौरा कर र जवानां सागे मुलाकात रो ई कार्यक्रम है।

000

नुवी पीढ़ी ने अपराध करण ऊं बचावण सारु पुलिस सामाजिक सरोकार रो खास अभियान चलावेला। जयपुर रेंज रा आईजी अजयपाल लांबा आज झुंझुनूं मांय जिला पुलिस रा अहलकारां री मीटिंग मांय आ जाणकारी दीनी। वे बतायो के अभियान रा तहत सगळा अहलकार स्कूलां अर कॉलेजां मांय जा र नौजवानां ऊं बातचीत कर र वां ने अपराध नी करण री सीख देवेला।

सामाजिक न्याय अर अधिकारिता विभाग रा सचिव अमित यादव कह्यो है के सरकारी सेवा रो मकसद जनता री जिन्दगी मांय सार्थक बदलाव लावणो है। वे आज नई दिल्ली मांय राखी ज्या राष्ट्रीय कर्मयोगी जन सेवा कार्यक्रम रा उद्घाटन जळसा मांय बोल रह्या हा। श्री यादव कह्यो के लोक सेवकां रो हर काम देश री बरकत मांय योगदान देवे है। ओ कार्यक्रम सरकारी अहलकारां बीचे खुली चर्चा, टीमवर्क अर व्यावहारिक समस्या-समाधान ने बधावो देवण सारु राखी ज्यो।

000

जन स्वास्थ्य अभियांत्रिकी मंत्री कन्हैया लाल कह्यो है के राज्य सरकार हर गांव अर ढाणी ताई पीवण रो पाणी पूगावण माथे खास ध्यान दे रही है। वे विधानसभा मांय वां रा महकमा री अनुदान मांगां माथे व्ही बहस रो जवाब देता थकां आ जाणकारी दीनी। जन स्वास्थ्य अभियांत्रिकी मंत्री कह्यो के राजस्थान वाटर सप्लाई अर सीवरेज कानून 2025 रो मजमून तैयार कर लियो ज्यो है। इण मांय पाणी रो बेजा इस्तेमाल करण वाळां अर गैर कानूनी कनेक्शन लेवण वाळां रे खिलाफ करडी कार्रवाई करण रा प्रावधान राखी ज्या है। चर्चा पाछे सदन मांय विभाग री 118 अरब 66 करोड़ रुपया ऊं बत्ती रकम री अनुदान मांगां ध्वनिमत ऊं पास कर दीरीजी। जलदाय मंत्री सदन मांय गृह राज्य मंत्री जवाहर सिंह बेदम बतायो के राज्य मांय नशीली चीजां री गैर कानूनी बिक्री अर तस्करी रोकण सारु चुणी ज्या जिलां मांय खास पुलिस टीमां बणायी ज्यी है।

000

उदयपुर रा सज्जनगढ़ वन्यजीव अभयारण्य हलका मांय धधक रही लाय ने ध्यान राखता थकां अभयारण्य अर बायोलॉजिकल पार्क मांय सैलाणियां री आवण-जावण माथे रोक लगा दीरीजी है। लारला तीन दिन ऊं लाग रही लाय आज बाज रह्या तेज बायरा रे कारण और भभक र करीब 7 हेक्टेयर हलका मांय पसर ग्यी। दमकल री 22 गाड़ियां री मदद ऊं लाय माथे कोशिश करी जा रही है। मौका माथे वन विभाग, दमकल अर पुलिस रा 140 ऊं बत्ता कर्मचारी ज्यादा तैनात है। रिहायशी हलकां ने आग ऊं बचावण सारु छह घर खाली करायी ज्या है। जिला कलेक्टर नमित मेहता अर एस.पी. योगेश गोयल लाय वाळा हलका रो दौरा कर र हालात रो जायजो लीनो अर अहलकारां ने ज़रूरी हुकम दीनो।

000

मुख्यमंत्री भजनलाल शर्मा आज तड़के सिरौही जिला रा आबूरोड कने व्ह्या सड़क हादसा मांय 6 जणां री मौत माथे गहरो दुःख जतायो है। वे हादसा मांय जख्मी लोगां रे बेगा ठीक व्हेवण री कामना करता थकां अहलकारां ने वां रो ज़रूरी ईलाज तैय करण रा हुकम दीना। ध्यानजोग है के आज तड़के सिरौही जिला मांय किवरली कने कार अर ट्रौला री टक्कर रे कारण व्ह्या हादसा मांय छह जणां री मौत व्हे ग्यी ही। कार मांय सवार जालौर रा रहवासी अ लोग गुजरात रा अहमदाबाद ऊं पाछा आ रह्या हा।

000

आज नेशनल डेंटिस्ट डे मनायो जा रह्यो है। ओ दिन दांतां रा डॉक्टरां रा योगदान ने मान देवण अर दांतां री देखभाल रा प्रति जाग जगावण सारु हर साल 6 मार्च ने मनायो जावे है। जयपुर रा दांतां रा डॉक्टर जतिन मिश्रा आकाशवाणी ने बतायो के बीड़ी-सिगरेट पीवण अर तम्बाकू ऊं बणी चीजां काम लेवण ऊं दांतां अर मुंह मांय कैंसर री बीमारी व्हेवण री शंका बध जावे है।

000

प्रदेश मांय होळी रो उमाव निजर आवण लाग्यो है। मिंदरा अर घरां मांय होळी रा फाग रा रंग निजर आ रह्या है। राजधानी जयपुर रा गोविंद देवजी मिंदर मांय काल होळी उत्सव सरु व्हेला। नौ मार्च ताई चालण वाळा ई उत्सव मांय एक सौ ऊं बत्ता कलाकार भजन अर शास्त्रीय नृत्य रा कार्यक्रम पेश करेला। 10 अर 11 मार्च ने फूलां री होळी खेली जावेला। पर्यटन विभाग री ओर ऊं नौ मार्च ऊं ब्रज हलका मांय होळी महोत्सव रा आयोजन राख्या जावेला। नौ मार्च ने डीग, दस ने कामां अर 11 मार्च ने भरतपुर मांय

उत्सव मणायो जावेला। पाली मांय होळी रा गीतां अर गेर नाच रे दौरान काम आवण वाळा चंग बणाया जा रह्या है। म्हाणा खबरनवीस बतायो के फागण री सरुआत सागे ई ज़िला मांय होळी उत्सव रा कार्यक्रम राख्या जावे है अर चंग री थाप माथे नाच-गाण कर्या जावे है।

होळी रा त्यौहार रे मौके मुसाफिरां री आवण-जावण ने आसान बणावण सारु 6 खास रेलगाड़ियां चलायी जावेला। उत्तर-पश्चिम रेलवे रा मुख्य जनसम्पर्क अधिकारी शशि किरण बतायो के मुसाफिरां रा सुबीता सारु खास गाड़ियां चलावण रो फैसलो करी ज्यो है।